

Na osnovu člana 19. stav 1. Zakona o Vladi Federacije Bosne i Hercegovine („Službene novine Federacije BiH“, br. 1/94, 8/95, 58/02, 19/03, 2/06 i 8/06) a u vezi sa članom 4. stav 3. Zakona o privatizaciji preduzeća („Službene novine Federacije BiH“, br. 27/97, 8/99, 32/00, 45/00, 54/00, 61/01, 27/02, 33/02, 28/04, 44/04, 42/06 i 4/09, Vlada Federacije Bosne i Hercegovine, na 20. sjednici održanoj 4. oktobra 2011. godine, donosi,

## **UREDBU**

### **O DOPUNAMA UREDBE O METODOLOGIJI ZA PRIPREMU PROGRAMA I IZRADU POČETNOG BILANSA PREDUZEĆA ZA PRIVATIZACIJU**

#### **Član 1.**

U Uredbi o metodologiji za pripremu programa i izradu početnog bilansa preduzeća za privatizaciju („Službene novine Federacije BiH“, broj 40/10-Prečišćeni tekst), iza člana 38. uspostavlja se novo poglavlje „IVA PRISTUP RELEVANTNIM PODACIMA I INFORMACIJAMA KOD PREDUZEĆA U POSTUPKU PRIVATIZACIJE“ i dodaje se novi čl. 38a. i 38b., koji glase:

#### **„Član 38a.**

Preduzeće u postupku privatizacije dužno je da po pismenom zahtjevu vlade ili nadležnog ministarstva trećim licima omogući nesmetan pristup svim podacima i poslovnoj dokumentaciji koja je od značaja za donošenje odluke za kupovinu, odnosno prodaju državnog/društvenog kapitala.

Pod omogućavanjem nesmetanog pristupa podacima i poslovnoj dokumentaciji od značaja za donošenje odluke za kupovinu, odnosno prodaju kapitala, između ostalog, smatra se i omogućavanje vršenja dubinska analiza (due dilligence), odnosno nesmetanog uvida u svu dokumentaciju koja se tiče finansijskog, pravnog i operativno-tehničkog poslovanja preduzeća.

Pismeni zahtjev vlade ili nadležnog ministarstva iz stava 1. ovog člana, između ostalog, određuje početak i završetak perioda u kojem se vrši pregled dokumentacije koja se odnosi na finansijsko, pravno i operativno-tehničko poslovanje preduzeća i lica kojima će preduzeće omogućiti nesmetan uvid u tu dokumenatciju.

Vrsta i obim dokumentacije koju preduzeće treba da stavi na nesmetan uvid precizira se zahtjevom vlade ili nadležnog ministarstva iz stava 3. ovog člana.

#### **Član 38b.**

U slučaju da preduzeće ili neko od odgovornih lica tog preduzeća ne postupi u skladu sa članom 38a. ove Uredbe, vlada ili nadležno ministarstvo je ovlašteno da putem finansijske policije i drugih organa trećem licu omogući nesmetan uvid u svu dokumentaciju koja se odnosi na finansijsko, pravno i operativno-tehničko poslovanje preduzeća.

Finansijska policija i drugi nadležni organi će postupiti po pismenom zahtjevu vlade ili nadležnog ministarstva odmah, a najkasnije u roku od 48 sati od primljenog zahtjeva, te

ovlaštenim licima po zahtjevu vlade ili nadležnog ministarstva omogućiti nesmetan pristup cjelokupnoj traženoj dokumentaciji preduzeća.

U slučaju iz stava 2. ovog člana, službenici finansijske policije i drugih organa, u okviru svojih ovlaštenja omogućit će licima iz člana 38a. stav 3. ove Uredbe nesmetan uvid u traženu dokumentaciju u prostorijama preduzeća ili drugim odgovarajućim prostorijama“.

### **Član 2.**

U članu 44. u stavu 1., iza tačke 2. dodaje se tačka 3. koja glasi:

„3. ne postupi po zahtjevu vlade ili nadležnog ministarstva iz čl. 38a i 38b. ove Uredbe“.

### **Član 3.**

Ova Uredba stupa na snagu narednog dana od dana objavljivanja u „Službenim novinama Federacije BiH“.